



partii naleraq

15.april 2016

UPA2016/23

Qalerallit akitsuutaat aamma aalisakkat ikerinnarsiortut ilaasa Tunumi aalisarnermi pisarineqartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat nr. x, xXx 2016-imeersoq

Qalerallit akitsuutaat aamma aalisakkat ikerinnarsiortut ilaasa Tunumi aalisarnermi pisarineqartunut akitsuutaat pillugu tamannalu Partii Naleqqap oqaaseqarfigissavarput.

Nunatsinni aalisarnikkut inuussutissarsiornitta ingerlalluarnissaa aammalu aalisarnermik inuussutissarsiuteqartut pitsaasumik sinaakkuteqarlutik inuussutissarsiuteqarnissaat pingaartorujussuusoq Partii Naleqqamiit oqaatigissavarput.

Akitsuutit ileqquliutinnarlugit Naalackersuisuniit pissuseqaleriartorneq assut ilungersunartutut isigaarput, tassami isumaqarpugut inuit kaasarfiinnaasigut aningaassanik nussuinnarnikkut nunatta ineriartortillugu ilusilersorniarnera ingerlanneqarsinnaanngitsoq.

Nunatsinni aningaasaqarnikkut tamatta ingerlalluarnissarput kissaatigaarput, aammalu ukiuni makkunani inuuniarnikkut akit qaffakkiartuinnartut suli ilungersunarsiartorput tassalu akitsuutit inuuniarnikkut akilertakkatta qaavatigut pitsaanerulersitsinngimmat.

Aalisagartassat tamakkiisumik aalisarneqanngitsoortartut tamarmik pisarineqartarnissaat pimoorullugu aallartittariaqalerparput, assersuutigalugu ukiut kingulliit qaleralittassat tamakkerneqanngitsoortarput. aalisartullu tunisassiortullu aningaasarpasuit isertinngitsoortarpaat aammalu akileraarutitigut isertitassaagaluit annaaneqartarlutik taamaattumik aalisagartassat tamakkerlugit pisarineqartarnissaat ilungersuuttariaqalerparput.

Aalisariuteqarnikkut ineriartorneq pitsaanerulissappat Tunumi aalisarnikkut assersuutigalugu avaleraasartoortassat nunaqavissunik aalisarneqarneri ilumut akitsuutinik akilersuisinneqarnissaat pissusissamisoornersoq.

Aammalu uani inatsisissami saqqummiunneqartut akitsuutit tassalu nunatta avataaniit umiarsuarmik attartornikkut akitsuusiisoqassappat nalilersortariaqarpoq nutaamik piginneqatigiit aalisartut aallartinniartut aamma eqqarsaatigalugit.

Eqqarsarnartoqartipparput nunaqavissut aalisarnermik namminneq ingerlatsisut ilumut tulluarnersoq akiliisinneqarnissaat , tassami qaqugu nunaqavissut aalisartut nutaat umiarsuaateqanngitsut umiarsuaateqarnikkut siuarsassagamik? Nunaqavissummi siunissami aalisarnikkut umiarsuaateqarnikkullu siuarsaassappata piginnaanngorlutillu ingerlalissappata taava akitsuummik akileraarummik akiliisarnissaat isumaqatiginngilarput.

Siunissamimi namminneq umiarsuuteqarnikkut ingerlalerpata suliffissat nutaat akileraarutillu isertitassat nutaat pilersinneqarsinnaangussammata taamaattumik akitsumik akiliisalernissaanik massakkut siunnersuut isumaqatiginngilarput.

Kiisalu aamma saqqummiussiissummi oqaatigineqarpoq avataasiortut kilisaatit eqqarsaatigalugit akitsuummik akiliinikkut ilungersunartorsiortitsinaviangitsut aningaasaqarnikkut attanneqarsinnaammat.

Aap immaqami taamaassinnaavoq? Kisianni nalunngilarput akitsuut 18.milliunit-kruunit taakkummata avataasiornermi inuttanik akilerneqartussat tassa kilisaatini inuttaasut aningaasarsiaat 18.-milliunit-kruuninik ikinnerusunik aningaasarsissammata. Tamannalu soorunami inuttaasunut ilungersunartorsiortitsissasoq takusinnaavarput tassami aningaasarsiakinnerulissamata.

Naggataatigut inatsisissamik inuussutissarsiortunut tusarnianermi piffissap sivikippallaarnera naammagittaalliutigineqarmat isumaqatigaarput tassami siunissamut aningaasarsiornikkut aalisarnikkullu ineriartussagunik pilersaarusiussagunik piffissaqarnerullutik isummersornissaat pingaartutut isigigatsigu.

Tassalu akitsuusinissaq saqqummiunneqartoq tamakkiisumik itigartipparput.

Hans Enoksen